

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE
DOM NARODA
Broj: 02-02-356/10
Sarajevo, 11.03.2010. godine

Z A P I S N I K

13. VANREDNE SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 11. marta 2010. godine

Sjednica je počela u 11.27.

Sjednici je predsjedavao Stjepan Krešić, predsjedavajući Doma naroda Parlamenta Federacije Bosne i Hercegovine.

Na početku sjednice predsjedavajući je pozdravio delegate, zamjenika premijera Gavrila Grahovca, ministre u Vladi Federacije, goste, predstavnike Međunarodne zajednice i međunarodnih organizacija i udruženja, kao i predstavnike akreditiranih medijskih kuća koji prate rad sjednice.

Izostanak sa sjednice opravdali su Jasenko Tufekčić, Nikola Simić i Josip Perić.

Na osnovu evidencije Stručne službe, predsjedavajući je konstatovao da sjednici prisustvuje 46 delegata, što čini većinu, te Dom naroda može raditi i punovažno odlučivati.

Predsjedavajući je obavijestio delegate da je Vlada Federacije dostavila sljedeće prijedloge zakona sa prijedlogom da se razmatraju po hitnom postupku I., na osnovu rezultata glasanja, konstatovao:

- sa 39 glasova za, uz dva glasa protiv i uz tri uzdržana glasa, prihvaćeno je da se Prijedlog Zakona o izmjenama i dopunama Zakona o krivičnom postupku Federacije Bosne i Hercegovine razmatra po hitnom postupku,

- sa 40 glasova za, uz dva glasa protiv i uz dva uzdržana glasa, prihvaćeno je da se Prijedlog Zakona o dopuni Zakona o prostornom planiranju i korištenju zemljišta na nivou Federacije Bosne i Hercegovine razmatra po hitnom postupku.

Elvira Abdić-Jelenović je, ispred Odbora za prostorno uređenje, ekologiju i stambeno-komunalne poslove, predložila da se sa dnevnog reda ove sjednice skine 2. tačka – Prijedlog Zakona o dopuni Zakona o prostornom planiranju i korištenju zemljišta na nivou Federacije Bosne i Hercegovine, budući da nije donesena Prostorna osnova Prostornog plana područja posebnog obilježja od značaja za Federaciju Bosne i Hercegovine "Autocesta na Koridoru Vc" jer je to uvjet za donošenje ovog zakona.

Besim Imamović predložio je da se u dnevni red ove sjednice uvrste odluke koje je donio Predstavnički dom, a koje se tiču Koridora Vc, tj. da se ispoštuje Zaključak donesen na sjednici Doma naroda u vezi sa ovim odlukama.

Alija Begović je, ispred Kluba delegata bošnjačkog naroda, zatražio stav Vlade Federacije u vezi sa ovim pitanjem, te zašto Zaključak Doma naroda nije ispoštovan i zatražio pauzu kako bi Klub mogao zauzeti stav o ovom pitanju.

Ispred Federalnog ministarstva prostornog uređenja govorila je Hanka Mušinbegović, pomoćnica federalnog ministra prostornog uređenja.

Nakon pauze, Alija Begović je, ispred Kluba delegata bošnjačkog naroda, predložio da Dom naroda donese zaključak koji je pročitao.

Elvira Abdić-Jelenović je, ispred Odbora za prostorno uređenje, ekologiju i stambeno-komunalne poslove, zatražila da se Dom naroda izjasni o Prijedlogu Odbora za skidanje 2. tačke sa dnevnog reda ove sjednice.

Na osnovu rezultata glasanja, predsjedavajući je konstatovao da Dom naroda nije prihvatio ovaj prijedlog jer je za glasalo 20 delegata, 16 je bilo protiv, a 12 uzdržanih.

U diskusiji u vezi sa predloženim Zaključkom učestvovali su Tomo Vidović i Besim Imamović, koji je izjavio da odustaje od prijedloga da se u dnevni red sjednice uvrste odluke usvojene u Predstavničkom domu, ako se usvoji Zaključak Kluba delegata bošnjačkog naroda.

Nakon toga, prešlo se na glasanje o Zaključku koji je predložio Klub delegata bošnjačkog naroda.

Na osnovu rezultata glasanja, predsjedavajući je konstatovao da je Dom naroda sa 33 glasa za, uz osam glasova protiv i uz sedam uzdržanih glasova, usvojio sljedeći:

ZAKLJUČAK

1. Obavezuje se Vlada Federacije Bosne i Hercegovine da do naredne sjednice Doma naroda dostavi sve potrebne odluke kojima će se aktivirati kreditna sredstva za izgradnju Koridora Vc.
2. Ukoliko Vlada Federacije Bosne i Hercegovine do naredne sjednice Doma naroda ne dostavi u parlamentarnu proceduru potrebne odluke, obavezuje se Kolegij Doma naroda da na dnevni red prve naredne sjednice Doma naroda uvrsti sve odluke koje je Predstavnički dom usvojio, a odnose se na izgradnju Koridora Vc

Predsjedavajući je, također, obavijestio delegate da se 4. tačka predloženog dnevnog reda - **Prijedlog Zakona o novčanim podrškama u poljoprivredi i ruralnom razvoju**, na zahtjev predlagača, skida sa dnevnog reda ove sjednice.

Potom se prešlo na glasanje o predloženom dnevnom redu, ta je Predsjedavajući konstatovao da je Dom naroda, sa 42 glasa za i uz četiri uzdržana glasa usvojio sljedeći:

DNEVNI RED

1. Prijedlog Zakona o izmjenama i dopunama Zakona o krivičnom postupku Federacije Bosne i Hercegovine – hitni postupak,
2. Prijedlog Zakona o dopuni Zakona o prostornom planiranju i korištenju zemljišta na nivou Federacije Bosne i Hercegovine – hitni postupak,
3. Prijedlog Zakona o izmjenama i dopunama Zakona o igrama na sreću,
4. Prijedlog Zakona o mladima Federacije Bosne i Hercegovine (predlagač: Komisija za pitanja mladih Predstavničkog doma).

1. Prijedlog Zakona o izmjenama i dopunama Zakona o krivičnom postupku Federacije Bosne i Hercegovine

Prijedlog Zakona utvrdila je Vlada Federacije Bosne i Hercegovine.

Predstavnički dom Parlamenta Federacije je na nastavku 29. sjednice od 09. marta 2010. godine usvojio Prijedlog Zakona u tekstu kako ga je predložila Vlada Federacije.

Ured Visokog predstavnika poslao je dopis koji se tiče Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Feliks Vidović, federalni ministar pravde.

U raspravi je učestavovao Igor Rajner.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 44 glasa za, uz jedan glas protiv i uz dva uzdržana glasa, usvojio Prijedlog Zakona o izmjenama i dopunama Zakona o krivičnom postupku Federacije Bosne i Hercegovine.

2. Prijedlog Zakona o dopuni Zakona o prostornom planiranju i korištenju zemljišta na nivou Federacije Bosne i Hercegovine

Prijedlog Zakona utvrdila je Vlada Federacije Bosne i Hercegovine.

Predstavnički dom Parlamenta Federacije je na 29. sjednici od 23. februara 2010. godine usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila svoje izvještaje.

U raspravi je učestvovala Elvira Abdić-Jelenović.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 34 glasa za, uz četiri glasa protiv i uz osam uzdržanih glasova, usvojio Prijedlog Zakona o dopuni Zakona o prostornom planiranju i korištenju zemljišta na nivou Federacije Bosne i Hercegovine.

Nakon toga, Predsjedavajući je predložio da se o 3., 4. i 5. tački obavi zajednička rasprava a izjašnjavanje obavi pojedinačno, što su delegati prihvatili.

3. Prijedlog Zakona o izmjenama i dopunama Zakona o igrama na sreću

Prijedlog Zakona utvrdila je Vlada Federacije Bosne i Hercegovine.

Predstavnički dom Parlamenta Federacije je na 29 sjednici od 23. februara 2010. godine usvojio Prijedlog Zakona sa tri amandmana koje je Vlada Federacije prihvatila, pa su postali sastavni dio Prijedloga Zakona i dva

amandmana koje Vlada Federacije nije prihvatila, ali ih je Predstavnički dom izglasao.

Na Prijedlog Zakona amandmane su podnijeli: Alija Begović dva amandmana koji se odnose na čl. 1. i 2., Sead Čaušević jedan amandman koji se odnosi na član 2., Klub delegata hrvatskog naroda jedan amandman koji se odnosi na član 9. stav 2., Muharem Serbezovski jedan amandman koji se odnosi na dodavanje nove alineje 9. drugom stavu u članu 2. i Svetozar Pudarić jedan amandman koji se odnosi na 3. alineju u stavu 1. član 2.

Amandmani su dostavljeni Vladi na izjašnjanje.

Prijedlog Zakona razmatrala su nadležna radna tijela i dostavila svoje izvještaje.

U raspravi su učestvovali: Alija Begović, Saša Magazinović, Igor Rajner, Sead Čaušević, Mislav Sučić, Lidija Bradara, Tomo Vidović, Muharem Serbezovski, Radoje Vidović i Denis Zvizdić.

Nakon rasprave, predsjedavajući je predložio da se odgodi izjašnjanje o Prijedlogu Zakona dok se Vlada Federacije ne izjasni o podnesenim amandmanima, što su delegati i prihvatili.

4. Prijedlog Zakona o mladima Federacije Bosne i Hercegovine

Predlagač ovog Zakona je Komisija za pitanja mladih Predstavničkog doma.

U vezi sa ovim zakonom Vlada Federacije dostavila je svoje Zaključke, a naknadno i devet amandmana koji su dostavljeni predlagaču Zakona na izjašnjanje.

Predlagač je dostavio pisano Izjašnjenje kojim je prihvatio amandmane I., II., III., IV., V., VI. i IX., dok amandmane VII. i VIII. nije prihvatio.

Prihvaćeni amandmani glase:

Amandman I.

U članu 1. dodaje se novi stav koji glasi:

“Ovim zakonom uređuju se pitanja od interesa za život, položaj i djelovanje mladih ljudi u Federaciji Bosne i Hercegovine.”

Amandman II.

U članu 4. u tački 8. u trećem redu iza riječi “potrebe” riječ “probleme” zamjenjuje se riječima: “način rješavanja problema”.

Amandman III.

U Poglavlju II. PRAVA I OBAVEZE MLADIH mijenja se redosljed članova, tako da čl. 6. i 7. postaju čl. 5. i 6. a član 5. postaje član 7.

Amandman IV.

U članu 8. u stavu 2. iza riječi: "određene i oblikovane od mladih ljudi" piše se tačka, a ostatak rečenice se briše.

Amandman V.

Član 9. se briše.

Amandman VI.

U članu 17. u stavu 3. iza riječi "Kanton" riječi: "ukoliko nađe za shodno" zamjenjuju se riječima: "ukoliko postoji potreba".

Amandman IX.

U članu 22. u stavu 4. riječ "obrazovanje" zamjenjuje se riječju "uspostavljanje".

Predstavnički dom je na nastavku 28. sjednice od 16. februara 2010. godine usvojio Prijedlog Zakona sa četiri amandmana koje je predlagač prihvatio, pa su postali sastavi dio Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložila je Indira Karović, predsjednica Komisije za pitanja mladih Predstavničkog doma.

Ispred Odbora za obrazovanje, nauku, kulturu, sport i pitanja mladih govorio je Anto Bilić, predsjednik Odbora.

U raspravi su učestvovali: Mira Ljubijankić, Tomo Vidović, Kenan Keserović, Bojan Bošnjak, Saša Magazinović, Gavriilo Grahovac zamjenik premijera, Meliha Alić federalna ministrica obrazovanja i nauke, Elvira Abdić-Jelenović, Muhamed Osmić, Lidija Bradara, Zoran Budimić i Muharem Serbezovski.

Budući da predlagač nije prihvatio amandmane VII. i VIII. Vlade Federacije, a kako Vlada nije odustala od ovih amandmana, prešlo se na glasanje o njima.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 31 glasom za, uz četiri glasa protiv i uz sedam uzdržanih glasaova, usvojio Amandman VII. koji glasi:

Amandman VII.

U članu 22. u stavu 1. iza riječi: „u vezi sa mladim“ dodaje se zarez, a iza riječi: „a nadzor nad provođenjem ovog zakona“ dodaju se riječi: „vršit će Savjet za mlade Federacije“.

Potom se glasalo o Amandmanu VIII. koji se odnosi na dodavanje novog stava u članu 22.

Na osnovu rezultata glasanja, predsjedavajući je konstatovao da Dom naroda Parlamenta Federacije Bosne i Hercegovine nije usvojio Amandman VIII. jer je za glasalo 26 delegata, četiri delegata su bila protiv, a 11 delegata je bilo uzdržano.

Potom se prešlo na glasanje o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije Bosne i Hercegovine, sa 32 glasa za i uz devet uzdržanih glasova, usvojio Prijedlog Zakona o mladima Federacije Bosne i Hercegovine.

Budući da je Prijedlog Zakona usvojen u različitom tekstu u oba doma Parlamenta Federacije **potrebno ga je usaglasiti.**

* * *

Sjednica je završena u 14.08.

Transkript sjednice čini sastavni dio Zapisnika.

SEKRETAR

Izmir Hadžić

PREDSJEDAVAJUĆI

Stjepan Krešić